

Sociaal Crisis Plan cu focus riba mas concientizacion relaciona cu "Abuso di Mucha"

ORANJESTAD (AAN): Dia 20 di november ta un dia special caminda diferente instancianan y organizacionnan aki na Aruba y mundialmente ta tene actividadnan dedica na conscientisacion di derecho- nan di nos muchanan.

E aña aki no ta un exepcion y Sociaal Crisis Plan (SCP) ta trahando hunto cu diferente socionan cu ta organizando proyectonan cu lo brinda actividadnan pa nos muchanan y nan mayornan por disfruta durante e Siman di Lantamento di Mucha cu a cuminsa dia 15 di november na Centro di Bario Brazil y ta clausura dia 24 di november cu un caminata di Stichting Imeldahof.

SCP e aña aki a colabora cu Gionina Engelhardt pa sostene un proyecto unico, den cuadro di 30 aña di Dia Internacional di Derecho di Mucha, cu e meta pa trece mas conscientisacion riba e topico di abuso di mucha den un forma mas creativo y educativo yama Heartless Silence. Durante e Artfasion show Gionina Engelhardt lo lansa su coleccion pa prome biaha yama "Heartless Silence" cu lo ilustra diferente aspecto di abuso di mucha den un forma educativo.

Alavez conhuntamente cu SCP lo lansa un campaña di conscientisacion riba e tipico di abuso di mucha riba nos rednan social. Durante evento dia 20

di november di ArtFasion cu lo tuma luga na San Nicolas, SCP tambe lo tin un "booth" special caminda un team specialisa lo duna esnan presente e informacion debido y tambe lo parti material di informacion.

E meta di e colaboracion unico aki ta pa trece mas atencion y conscientisacion ariba e topico di abuso di mucha cu ta un problema grandi den nos comunidad. Pa asina haci e topico aki uno menos "taboo" pa kibra e cultura di silencio y nos papia over di e tema y tuma accion.

Abuso y negligencia di mucha ta un problema social grandi aki na Aruba y SCP ta keda enfoca pa sostene proyectonan cu tin e meta pa sigui conscientisa e comunidad di Aruba ariba e topico aki pa asina kibra e silencio cu ta eherce.

Abuso di mucha ta algo cu nos no por tolera ni acepta mas y a bira tempo pa nos no bira wak otro banda, sino enfrenta esaki. Si abo conoce of sa di un caso di abuso di mucha no keda keto, pero kibra e silencio. Yama pa conseho of ayudo si bo ta sospecha abuso of negligencia di menor pa haya mas informacion na Bureau Sostenemi cu ta e meldpunt oficial.

Paso tur mucha tin e derecho di proteccion y amor. E bienestar y seguridad di nos muchanan ta e responsabilidad di nos tur.